



Bentiaraq Ottosen  
Atassut

UKA 2023/38  
10. oktober 2023

**Kalaallit Nunaanni pinerluttulerinermik inatsisip aamma Kalaallit Nunaanni eqqartuussisarnermik inatsisip allanngortinneqarnerat pillugit inatsisissatut siunnersuutip (Digitaliusumik innarliisarnerit akiorneqarnissaannut suliniutit, matumani isumapiloqarneq tunngavigalugu tatiginnilersitsiniaanerup, grooming-ip, inerteqqutinngortinneqarnera, meeqqamik atoqateqarnerup pinngitsaaliinermut naligiissinneqarnera, malunnaarsaarluni atoqateqarneq, upperisarsiortut aqutsisuisa atoqateqarniarlutik inuup pisariaqartitsineranik imaluunniit pinngitsuuisinnaannginneranik atornerluineri il.il.) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut**  
(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### Siullermeenera

Ullumikkut digitaliusumik inuiaqatigiit ingerlatillugit annertuumik immitsinnut illersornissarput pingaaruteqarluinnarpoq. Aliangiiffigisassatut siunnersuut Naalakkersuisunit saqqummiunneqartoq taperserlugu oqaatigisinnaavarput.

Kalaallit Nunaanni pinerluttulerinermik inatsisip aamma Kalaallit Nunaanni eqqartuussisarnermik inatsisip allanngortinneqarnissaa pillugu Naalakkersuisut saqqummiusaat isumaqatigaarput, pingaartumilli meeqqap illersorneqarnissaa pillugu anguniaqarnerput ersersittariaqarparput tamattaalluta. Nunatsinni kinguaasiutitigut kanngutsaatsuliorneq imaluunniit kinguaassiutitigut atornerluineq Atassummiit sakkortuumik akuersaarneqarsinnaanngitsoq oqaatigisinnaavarput, taamatullu pinerluuteqarsimasoq sakkortuumik pineqaatissinneqartarnissaa anguneqartariaqartoq isumaqarpugut.

Meeqqat, timimikkut innarluutillit arlaatigulluunniit attuumassuteqartut kinguaassiutitigut atornerlunneqarsimasut sakkortuumik pisortanik illersorneqartariaqarput, taakkuupput timimikkut annertuumik innarligaasartut taamaammat sakkortooujussuarmik illersugaanissaat Atassummiit naqissuserlugu illersorneqartariaqartut isumaqarpugut.

Pinerluuteqarsimasoq tassaassaaq pineqaatissinneqartoq sakkortuumik, akuersaarneqarsinnaanngilarli pineqaatissinneqarsimasoq ukiut ikittuinnaat pineqaatissinneqarsimasut inaaniittussanngorlugu inissinneqartarnera. Atassummiit oqaatigisariaqarparput illersorneqarsinnaanngitsoq pineqaatissinneqarsimasoq ukiut marluk pineqaatissinneqarsimasut inaanni inissisimasarnera, tamanna annikippallaartoq isumaqarpugut.

Sakkortuumik Atassummiit pinerluttulerinermut inatsisit aqqissuuteqqinnissaat peqataaffigissavarput, qulakkeerumallugu nunatsinni toqqissisimaneq, tatigeqatigiinneq, nunalu ineriartorluartoq.

Una aaliangiiffigisassatut siunnersuut Naalakkersuisut saqqummiussaap taperserparput.